

Vladajuća koalicija mora osigurati provođenje reforme



Sada je od temeljnog značaja da ministri u Vijeću ministara BiH za sebe osiguraju maksimalnu slobodu za poduzimanje aktivnosti u okviru dogovorenih planova i da svedu na najmanju mjeru ograničenja koja im nameću kratkoročne kalkulacije političkih stranaka, piše visoki predstavnik i posebni predstavnik EU Christian Schwarz-Schilling u svojoj tjednoj kolumni.

“Mnogi ministri se još uvijek ponašaju kao da su prvo odgovorni svojim političkim strankama, a tek onda građanima Bosne i Hercegovine», upozorio je visoki predstavnik i posebni predstavnik EU u članku koji je objavljen danas u *Dnevnom avazu*, *Nezavisnim novinama* i *Večernjem listu*, i pozvao koalicijske stranke «da ministrima koje su imenovali daju slobodu da ostvare rezultate”.

Christian Schwarz-Schilling je naglasio da usprkos sporim počecima koji su prouzročeni stranačkim previranjima i usprkos strukturalnim manjkavostima koje ometaju uredno i učinkovito funkcioniranje vlasti u BiH, Vijeće ministara predvođeno Nikolom Špirićem uspjelo je ostvariti neke uspjehe u prvih 100 dana rada.

“Tokom protekla tri mjeseca premijer Nikola Špirić i njegov tim imali su značajnu i konstruktivnu ulogu u pitanjima kao što su pronalaženje rješenja za pitanje decertificiranih policajaca; dovođenje novog Regionalnog vijeća za saradnju u Sarajevo; vraćanje zračnog prostora Bosne i Hercegovine pod punu kontrolu organa civilne avijacije BiH i uvođenje

intenzivnijeg sudjelovanja predstavnika građanskog društva u javnom životu BiH. Ovo Vijeće ministara je takođe osiguralo donošenje sporazuma o socijalnom osiguranju sa Republikom Slovenijom, liberalizaciji viznog režima i sjedištu Agencije za poštanski promet BiH, sjedištu Direkcije za civilnu avijaciju i kontrolu leta, kao i o kvalitetu tečnog goriva».

Izražavajući pohvalu premijeru za postignute rezultate, visoki predstavnik i posebni predstavnik EU je izjavio "da bi se gospodin Špirić prvi složio sa mnom da je potrebno ostvariti više rezultata i da se odvijanje ovih procesa mora ubrzati".

Podsjetivši da je Vijeće ministara usvojilo i objavilo svoj Plan rada za 2007. godinu i koordiniralo usvajanje plana rada svakog ministarstva, Christian Schwarz-Schilling je rekao da će javnost u BiH mjeriti rad Vijeća ministara prema jasnim i mjerljivim zadacima koje je vlada sebi postavila.

Puni [tekst sedmične rubrike](#) visokog predstavnika i posebnog predstavnika EU dostupan je na adresama www.ohr.int i www.eusrbih.org.